

## *Sekapur Sirih*

Antologi CITRA merupakan wadah yang dibina oleh empat belas orang guru peserta Program Penyerapan Bahasa Melayu 2015 ke Brunei. Mereka telah menghasilkan cerpen yang boleh dijadikan bahan bacaan oleh para guru dan pelajar. Semasa di Brunei, antara lain guru peserta telah mengikuti program penulisan kreatif yang diselenggarakan oleh Dewan Bahasa dan Pustaka Brunei selain berpeluang melihat dengan lebih dekat kehidupan masyarakat setempat. Mereka juga mengikuti wisata ke kawasan perkampungan dan pusat-pusat budaya. Pengalaman yang dilalui amat berharga bagi membina karya penulisan mereka yang menyentuh sedikit sebanyak mengenai masyarakat setempat. Karya yang dimuatkan di dalam antologi CITRA ini mengetengahkan isu-isu yang dekat di hati pembaca sama ada yang berlaku di negara kita dan rantau ini.

Antologi CITRA memuatkan cerpen yang membawa tema, persoalan, luahan pandangan dan pemikiran yang agak luas. Isu-isu yang menyerlahkan emosi manusia, semangat perjuangan, harapan, kasih sayang, keutuhan keluarga dan keusahawanan; merupakan dokumentasi dan cerminan masyarakat kini yang ingin dijadikan renungan bersama. Isu-isu yang diketengahkan boleh dijadikan bahan perbincangan di bilik darjah.

CITRA ialah buah tangan guru untuk guru dan pelajar. Antologi cerpen ini diharapkan menjadi pemangkin untuk lebih ramai guru sebagai pelaksana kurikulum bersedia menggunakan bahasa Melayu secara kreatif untuk menghasilkan bahan sastera. Semoga CITRA berjaya memenuhi cita rasa pelajar dalam memperkaya bacaan ekstensif mereka.

Mohamed Noh Daipi

Pengarah, Pusat Bahasa Melayu Singapura  
Akademi Guru Singapura  
Kementerian Pendidikan Singapura